

四庫全書

集部

欽定四庫全書

唐詩紀事卷二十三

宋 計敏夫 撰

司馬退之

吳筠

蘇廣文

尉遲匡

王諲

陳希烈

高適

張彪

張子容

李之芳

崔彧

孟浩然

岑參

司馬退之

洗心詩云不踐名利道始覺塵土腥不味稻粱食始覺

神骨清羅浮奔走外日月無短明山瘦松亦勁鶴老飛
更輕逍遙此中客翠髮皆長生草木多古色鷄犬無新
聲君有出俗志不貪英雄名傲然脫冠帶改換人間情
去矣丹霄步向曉雲冥冥退之道士

吳筠

筠字正節華陽人舉進士不第天寶初請隸道士籍明
皇命待詔翰林高力士善浮屠乃短筠於帝筠懇還嵩
山大歷中死會稽剡中弟子私謚宗玄先生筠見惡於

力士而斥故文章深詆釋氏所善孔巢父李白歌詩略
相甲乙事潘師正學鍊養術天寶初遊會稽與李白隱
剡中赴闕薦白俱待詔翰林

覽古十四首云聖人重開濟明道欲救時孔席不暇暖
墨突何嘗緇興言振顏綱將以有所維君臣恣淫惑風
俗日凋衰二代業遽隕七雄遂交馳庶物墜塗炭區中
若焚絲秦皇燎儒術方冊靡孑遺大漢歷五葉斯文復
宗推乃驗經籍道與世同屯夷弛張固天意設教安能

持

棟宇代巢穴其來自二皇跡生固為累經始增百玉瑤
臺既滅夏瓊室復殞商覆車世不悟秦氏興阿房繼踵
迷反正漢冢崇建章力役獎萬人瑰竒殫八方狗志仍
未極促齡已云亡侈靡竟何在荆榛生廟堂

吾觀采苓什復感青蠅詩讒佞亂忠孝古今所悲姦
邪起諸害骨肉相殘夷漢儲殞江充晉嗣滅驪姬天性
猶可間君臣固其宜子胥烹吳鼎文種斷越鉞屈原沈

湘流厥戚咸自貽何不若范蠡扁舟無還期

魯侯祈正術尼父從棄捐漢主思英雄賈生被排遷始
皇重韓子及覩乃不然漢武喜相如既徵復忘賢遺遠
世咸爾賤今理共然方知古來主難以效當年

食其昔未偶落魄為狂生一朝君臣契雄辨何縱橫運
籌康漢業憑軼下齊城既以智所達還為智所烹豈若
終賤貧酣歌本無營

晁錯抱遠策為君納良規削彼諸侯權永用得所宜姦

臣負舊隙乘釁謀相危世主竟不辨身戮宗且夷漢景
稱欽明濫罰猶如斯比干與龍逢殘害何足悲

絳侯成大績賞厚位乃尊一朝對獄吏榮辱安可論蘇
生佩六印奕奕為殃源主父食五鼎昭昭成禍根李斯
佐二辟巨釁鍾其門霍孟翼二后伊戚及後昆天人忌
盈滿茲理固永存方知得意者何必乘朱轡滅景栖遠
壑絃歌對清樽一疏返海濱蔣詡歸林園蕭灑去物累
此謀誠足敦

聖人垂大訓奧義不苟設天道殃頑克神明佑懿哲斯
言猶影響安得復回穴鮫賸誕英睿唐虞育昏孽盜跖
何延期顏生乃短折魯隱全克讓禍機遂潛結楚穆肆
巨逆福柄奚赫烈田常弑其主祚國久罔缺管仲存霸
功世祀成詭說漢氏方版蕩群闇恣邪謫寒寒陳蕃徒
孜孜抗忠節誓期區宇靜爰使兇醜絕謀協事靡從俄
而返誅滅古來若茲類紛擾難盡列道遐理微茫誰為
我昭晰吾將詢上帝寥廓詎躋徹已矣勿用言忘懷庶

自悅古意

蘇廣文

自商山宿陶令隱居云聞道花源堪避秦幽尋數日不
逢人煙霞洞裏無雞犬風雨林中有鬼神黃公庭下三
芝秀陶令門前五柳春醉卧白雲閑入夢不知何物是
吾身

夜歸華川因寄幕府云山村寥落野人稀竹裏衡門掩
翠微溪路夜随明月入亭皋春伴白雲歸嵇康懶慢仍

耽酒范蠡逋逃又拂衣汀畔數鷗閑不起只應知我已
忘機

春日過田明府遇焦山人云陶公歸隱白雲溪買得春
泉溉藥畦夜靜竹間風虎嘯月明枝上露禽棲陳倉邑
吏驚烽火太白山人討鼓鞞相見只言秦漢事武陵溪
裏草萋萋

尉遲匡

李林甫當開元末權等人主幽并人尉遲匡耿槩士也

以頻年不第投書林甫皆擊刺之說匡有暮行潼關之
作云明月飛出海黃河流上天又觀內人樓上踏歌曰
芙蓉初出水桃李忽無言又塞上曲云夜夜月為青塚
鏡年年雪作黑山花林甫曰蕭穎士嘗忤吏部王尚書
幾至鞭扑子詩未方穎士吾名復異於王重欲相干三
思可矣匡知見怒惶怖趨出恓屑無依退歸林墅

王諲

除夜云今歲今宵盡明年明日催寒隨一夜去春逐五更

來氣色空中改容顏暗裏回風光人不覺已着後園梅
元夕觀燈云暫得金吾夜通看火樹春停車傷明月走
馬入紅塵妓雜歌偏勝場移舞更新應須盡記取說向
北米人

謹登開元進士第

陳希烈

奉和聖製三日詩云上巳迂龍駕中流泛羽觴酒因朝
太子詩為樂賓王錦纜方舟渡瓊筵大樂張風搖垂柳

色花發異林香野老無公事朝臣飲歲芳皇情被群物
中外洽恩光

雲生棟梁間云一片蒼梧意氤氳生棟梁下簾山足暗
開戶日添光偏使衣裘潤能令枕簟涼無心伴行雨何
必夢荆王

希烈宋州人工文章開元中褚無量元行冲卒希烈與
康子元進講禁中天寶中為相國忠忘之即薦韋見素
代相罷為太子太師失職無賴祿山盜京師遂相之肅

宗時賜死於家

高適

同顏六少府旅居秋中之作云人傳君昨悵然悲獨坐
深齋落木時逸氣舊來凌鷺雀高才何得混妍媸迹勞
黃綬人多嘆心在青雲世莫知不見鬼神無正直從來
州縣有瑕疵

封邱作云我本漁樵孟諸野一生自是悠悠者乍可狂
歌草澤中寧堪作吏風塵下祇言小邑無所為公門百

事皆有期拜迎官長心欲破鞭撻黎庶令人悲悲來向
家問妻子舉家盡笑今如此生事應須南畝田世情付
與東流水夢想舊山安在哉為銜君命日遲迴乃知梅
福徒為爾轉憶陶潛歸去來

開元二十六年有從元戎出塞而還者作燕歌行示予
適感征戍之事作燕歌行云漢家烟塵在東北漢將辭
家破殘賊男兒本自重橫行天子非常賜顏色縱金伐
鼓下榆關旌旆逶迤碣石間校尉羽書飛瀚海單于獵

火照狼山山川蕭條極邊土胡騎憑陵雜風雨戰士軍
前半死生美人帳下猶歌舞大漠窮秋草木腓孤城落
日鬪兵稀身當恩遇常輕敵力盡關山未解圍鐵衣遠
戍辛勤久玉筯應啼別離後少婦城南欲斷腸征人塞
北空回首邊庭颼颼那可度絕域蒼茫何所有殺氣三
時作陣雲寒聲一夜傳刁斗相看白刃血紛紛死節從
來豈顧勲君不見沙場征戰苦至今猶憶李將軍

適字達夫滄州人客梁宋間舉有道科哥舒翰表為西

河從事佐翰守潼關天子西幸適間道及帝河池遷侍御史後代崔光遠為西川節度使廣德中召還為右散騎常侍永泰初卒適以功名自許而言浮其實年五十始為詩即工以氣質自高每一篇出好事者輒傳布

商璠云適性落拓不拘小節恥預常科隱跡博徒才名自遠然適詩多胸臆兼有氣骨故朝野通賞其文至如燕歌行等篇甚多佳句日余所愛者未知肝膽向誰是令人却憶平原君吟諷不厭矣

古大梁行云古城蒼茫多荆榛驅馬荒城愁殺人魏王
宮館盡禾黍信陵賓客隨灰塵憶昔雄都舊朝市軒車
照耀歌鐘起軍容帶甲三十萬國步連營一千里全盛
須臾那可論高臺曲池無復存遺墟但有狐狸窟古地
空餘草木根暮天搖落傷懷抱倚劔悲歌對秋草俠客
猶傳朱亥名行人尚識夷門道白壁黃金萬戶侯寶刀
駿馬填山邱年代淒涼不可問往來唯有水東流

行路難云君不見富家翁舊時貧賤誰比數一朝金多

結豪富萬事勝人徒如虎子孫成長滿眼前妻能管絃
妾歌舞自矜一身忽如此却笑旁人獨愁苦東鄰少年
安所如席門窮巷出無車有才不肯學干謁何用年年
空讀書

邯鄲少年行云邯鄲城南遊俠子自矜生長邯鄲裏干
場縱博家仍富幾處報讎身不死宅中歌笑日紛紛門
外車馬長如雲未知肝膽向誰是令人却憶平原君君
不見即今交態薄黃金用盡還跡索以茲感歎辭舊遊

更於時事無所求且與少年飲美酒往來射獵西山頭

張虎

北遊遠酬孟雲卿云忽忽望前事志願能相乖衣馬久
羸弊誰信文與才善道居貧賤潔服蒙塵埃行行無定
心堞坎難歸來慈母憂疾疹家室念栖栖與君宿姻親
深見中外懷俟余惜時節悵望臨高臺

古別離云別離無遠近事歡情亦悲不聞車輪聲後會
將何時去日忘寄書來日乖前期縱知明當返一息千

萬思

杜子美寄張十二山人處詩云獨卧嵩陽客三違潁水
春艱難隨老母慘淡向時人謝氏登山屐陶公漉酒巾
群兒彌宇宙此物在風塵歷下辭姜被闕西得孟鄰旦
通交契密晚接道流新靜者心多妙先生藝絕倫草書
何太古詩興不無神曹植休前輩張芝更後身數篇吟
可老一字買堪貧讀子美詩則處蓋潁洛間靜者天寶
末將母避亂故子美以詩寄云

彪雜詩云富貴多勝事貧賤無良圖上德兼濟心中才
不如愚商者多巧智農者多膏腴儒生未遇時衣食不
自如久與故交別他榮我窮居到門懶入門何況千里
餘君子有褊性矧乃尋常徒行行任天地無為強親踈
神仙云神仙可學無百歲名大約天地何蒼茫人間半
哀樂浮生亮多感善事翻為惡爭先等驅逐中路苦瘦
弱長老思養壽後生笑寂寞五穀非長年四氣乃靈藥
列子何必待吾心滿寥廓

張子容

長安早春詩云開國維東井城池起北辰咸歌太平日
共樂建寅春雲靜青山樹冰開黑水濱草迎金埒馬花
伴玉樓人鴻漸看無數鶯聲聽欲頻何當桂枝擢歸及
柳條新

九日陪潤州邵使君登北固山云五馬向山椒重陽出
麗譙徐州帶綠水楚國在青霄張幕連江樹開筵接海
潮凌雲詞客語迴雪舞人嬌梅福慙仙吏羊公賞下僚

新豐酒舊美况是菊花朝

送孟浩然歸襄陽詩云東越相逢地西亭送別津風濤
開解纜雪海去愁人鄉在桃林岸山連楓樹春因懷故
園意歸與孟家鄰

孟浩然送張子容赴進士舉詩云夕曛山照滅送客出
柴門惆悵野中別殷勤歧路言茂林余偃息喬木爾飛
翻無使谷風誚須令友道存

除夜樂城簡孟浩然云遠客襄陽郡來過海畔家樽前

栢葉酒燈發九枝花妙曲逢盧女高才得孟家東山行
樂意非是競繁華

浩然歲除夜樂城張少府宅云雲海訪甌閩風濤泊島
濱何知歲除夕得見故鄉親于是乘桴客君為失路人
平生復能幾一別十餘春

巫山詩云巫嶺峇堯天際重佳期宿昔願相從朝雲暮
雨連天暗神女知來第幾峰

子容乃先天二年進士第曾為樂城尉與孟浩然友善

貶樂城尉日作云竄謫邊窮海川原近惡溪有時聞虎
嘯無夜不猿啼地暖花常發嵩高日易低故鄉可憶處
遥指斗牛西

李之芳

大歷中子美有夏夜李尚書筵送宇文石首赴縣聯句

云愛客尚書貴之官宅相賢子美酒香傾坐側帆影駐江

邊之芳翟表郎官瑞鳧看令宰仙或雨稀雲葉斷夜久燭

花偏子美數語歌紗帽高文擲彩牋之芳興饒行處樂離惜

醉中眠或單父長多暇河陽實少年子美客居逢自出為

別幾悽然之芳宇文晁尚書之甥崔或司業之孫也

之芳太宗子蔣王暉之曾孫有令譽安祿山奏為范陽
司馬祿山反自拔歸京師廣德初使吐蕃被留二歲乃
得拜禮部尚書改太子賓客堯子美哭之芳詩云江雨
銘旌濕湖風井選秋又曰復魄昭邱遠歸魂素澹偏蓋
死於江湖也

孟浩然

孟浩然襄陽人也骨貌淑清風神散朗救患釋紛以立
義灌園圃以全高交遊之中通脫傾蓋機警無匿學不
攻儒務拔菁華文不按古匠心獨妙五言詩天下稱其
盡善閑游秘省秋月新霽諸英聯詩次當浩然句曰微
雲淡河漢疎雨滴梧桐舉座嗟其清絕咸以之閣筆不
復為綴丞相范陽張九齡侍御史京兆王維尚書侍郎
河東裴肫范陽盧溪大理評事河東裴摠華陽太守榮
陽鄭倩之太守河東獨孤冊率與浩然為忘形交山南

採訪使太守昌黎朝宗謂浩然閑深詩律實諸周行必
詠穆如之頌因入奏與偕行先揚於朝約日引謁後期
浩然叱曰業已飲矣身行樂耳遑恤其他遂畢飲不赴
由是聞罷浩然不之悔也其好學忘名如此王士源他
時嘗筆讚之曰導漾炳靈寔生楚英浩然清發亦自其
名開元二十八年王昌齡遊襄陽時浩然疾發背且愈
相得歡飲浩然宴譙食鮮疾動終于南國年五十有子
儀甫浩然每為詩佇興而故作或遲成行不為飾動求

真適故以誕遊不利期以放情故常貧名劣繫於選部

聚不盈甌室雖屢空不給自若也

王士源序

傳曰張九齡為荊州辟置于府罷開元末病疽背卒後
樊澤為節度使時浩然墓碑壞符載以牋叩澤曰故處
士孟浩然文質傑美殞落歲久門喬陵遲邱隴頽沒永
懷若人行路慨然前公欲更築大墓闔州搢紳聞風竦
動而今外迫軍旅內勞賓客牽耗歲時或有未遑誠令
好事者乘而有之負公夙志矣澤乃更為刻碑鳳林山

南封寵其墓初王維過郢州畫浩然像于刺史亭因曰
浩然亭咸通中刺史鄭誠謂賢者不可斥其名更曰孟
亭

王維憶孟云詩曰故人今不見日夕漢江流借問襄陽
老江山空蔡州

皮日休孟亭記云明皇世章句之風大得建安體論者
推李翰林杜工部為尤介其間能不愧者惟吾鄉之孟
先生也先生之作過景入詠不拘奇抉異今齷齪束人

口者涵涵然有干霄之興若公輸氏當巧而不巧者也
北齊美蕭愨芙蓉露下落楊柳月中疎先生則有微雲
澹河漢疎雨滴梧桐樂府美王融日霽沙嶼明風動甘
泉燭先生則有氣蒸雲夢澤波動岳陽城謝朓之詩句
精者有露濕寒塘草月映清淮流先生則有荷風送香
氣竹露滴清聲此與古人爭勝於毫釐也

明皇以張說之薦召浩然令誦所作乃誦北闕休上書
南山歸弊廬不才明主棄多病故人疎白髮催年老青

陽逼歲除永懷愁不寐松月夜牕虛帝曰卿不求朕豈朕棄卿何不云氣蒸雲夢澤波動岳陽城因是故棄

商璠云余嘗謂禰衡不遇趙壹無祿其過在人及觀襄陽孟浩然磬折謙退才名日高天下藉其竟淪落明代終於布衣悲夫子方知命矣且浩然詩文華采芊茸經縷綿密半好雅調全削凡體至如衆山遙對酒孤嶼共題詩無論興象復兼故實又波動岳陽城亦為高唱也建德江宿云移舟泊煙渚日暮客愁新野曠天低掛江

清月近人

裴司士見尋云府寮能枉顧佳醞復新開落日池上酌
清風松下來厨人具鷄黍稚子摘楊梅誰道山公醉猶
能騎馬迴

早寒江上有懷云木落雁初度北風江上寒我家江水
上遙隔楚雲端鄉淚客中盡孤帆天際看迷津欲有問
平海夕漫漫

永嘉上浦館逢張子容云逆旅相逢處江村日暮時衆

山遥對酒孤嶼共題詩
解宇鄰蛟室人烟接
島夷鄉關萬餘里
失路一相悲

湖上作云八月湖水平
含虛混太清氣蒸雲
夢澤波動岳陽城
欲濟無舟楫端居恥
聖明坐觀垂釣者
空有羨魚情

峴山作云石潭傍隈隩
沙榜曉黃緣試垂竹竿
釣果得查頭鱖

又冬至過友人云鳥泊
隨陽雁魚藏縮項鱖
故杜子美

憶襄陽云吾友襄陽孟浩然新詩句句盡堪傳至今者
舊無他語謾釣查頭縮頸鱗

題鹿門山云清曉因興來乘流越江峴沙禽近相識浦
樹遙莫辨漸到鹿門山山明翠微淺品潭多屈曲舟楫
屢回轉昔聞龐德公採藥遂不返金澗餌芝朮石牀卧
苔蘚紛吾感者舊結纜事攀踐隱迹今尚存高風邈已
遠白雲何時去丹桂何偃蹇探討意未窮迴艇夕陽晚
張祜題浩然宅云高才何必貴下位不妨賢孟簡雖持

節襄陽屬浩然

岑參

送王大昌齡赴江寧詩云對酒寂不語悵然悲

一作愁送

君明時未得用

未字一作不

白首徒攻文澤國從一官滄波

幾千里群公滿闕下獨去過淮水舊家富春渚嘗憶卧

江樓自聞君欲行頻望南徐州窮巷獨閉門寒燈靜深

屋北風吹微雪抱被肯同宿君行到京口正是桃花時

舟中饒孤興湖上多新詩潛虬且深蟠黃鶴

一作鶴

飛未

晚惜君青雲器努力加飧飯

奉送李太保兼御史大夫充渭北節度使即太尉光弼
之弟也詩云詔出未央宮登壇近摠戎上公周太保副
相漢司空弓抱關西月旗飛渭北風弟兄皆許國天地
荷成功

宿華陰東郭客舍憶閩防詩云次舍山郭近解鞍鳴鐘
時主人炊新粒行子充夜飢閏月生首陽照見華陰祠
蒼茫秋山晦蕭瑟寒松悲久從園廬別遂與朋知辭一
作

相知舊窳蘭杜晚歸軒今已遲

春夢詩云洞庭

一作洞房

昨夜春風起故人尚隔

一作遙憶美人

湘

江水枕上片時春夢中行盡江南數千里

參南陽人文本之後登天寶進士第累為安西關西節

度判官入為祠功二外郎虞庫二正郎出為嘉州刺史

副元帥杜鴻漸表公兼侍御史列于幕府使罷寓于蜀

中原多故卒死於蜀

商璠云參詩語奇體峻意亦新遠至如長風吹白茅野

火燒枯桑可謂逸矣又山風吹空林颯颯如有人頗稱
幽致也

暮秋山行云疲馬卧長坂夕陽下通津山風吹長林颯
颯如有人蒼梧霽涼雨石路無飛塵千念集暮節萬籟
悲蕭辰鷓鴣昨夜鳴蕙草色已陳况在遠行客自然多
苦辛

至大梁却寄康城主人云一從棄魚釣十載干明王無
由謁天階却欲歸滄浪仲秋至東郡遂見天雨霜昨夜

夢故山芳蕙色已黃平明辭鐵邱薄暮遊大梁仲秋蕭
條景拔刺飛鵝鷓四郊陰氣閉萬里無晶光長風吹白
茅野火燒枯桑故人南燕吏籍籍名皆香聊似玉壺贈
置之君子堂

衛尚書赤驃馬歌云君家赤驃畫不得一團旋風桃花
色紅纓紫鞵珊瑚鞭玉鞍錦韉黃金勒請君鞞出看君
騎尾長窄地如紅絲自矜諸馬皆不及却憶百金新買
時香街紫陌鳳城內行人見者誰不愛揚鞭驟急白汗

流美影行騎碧蹄碎紫鬃胡雛金剪刀平明剪出三駿
高樞上看時獨意氣衆中牽出偏雄豪騎將獵向南山
口城南狐兔不復有草頭一點疾如飛却使蒼鷹翻向
後憶昨看君朝未央鳴珂擁蓋滿路香始知邊將真富
貴可憐人馬相輝光男兒意氣得如此駿馬長鳴北風
起待君東去掃胡塵為君一日行千里

北庭北樓呈幕中諸公云嘗讀西域傳漢家得輪臺古
塞千年空陰山獨崔嵬二庭近西海六月秋風來日暮

上北樓殺氣凝不開大荒無鳥飛但見白龍堆舊國渺
天未歸心日悠哉上將新戰勝西郊絕煙埃邊城寂無
事撫劍空徘徊幸得趨幕中託身廁群才早知安邊計
未盡平生懷

玉門關蓋將軍歌云蓋將軍真丈夫行年二十執金吾
身長七尺頗有鬚玉門關城迴且孤黃沙萬里百草枯
南鄰犬戎北接胡將軍到來備不虞五千甲士膽力靡
軍中無事但歡娛暖屋繡簾紅地爐織成絳衣花翟毳

燈前侍婢瀉玉壺金鎬亂點野醅酥紫紱金章左右趨
問著即是蒼頭奴美人一雙閑且都朱脣翠眉映月眸清
歌一曲世所無今日喜聞鳳將雛可憐絕勝秦羅敷使
君五馬謾踟躕野草繡窠紫羅襦紅牙鏤馬對檇捕玉
盤纖手撮作盧叢中誇道不曾輸握上昂昂皆駿駒桃
花叱撥價最殊騎將獵向城南隅臘日射殺千年狐我
來塞外按邊儲為君取醉酒剩酤醉爭酒盞相誼呼却
憶咸陽舊酒徒

武威送劉單判官赴西行營使呈高開府云熱海亘鐵
門火山赫金方白草磨天涯湖沙莽茫茫夫子佐戎幕
其鋒利如霜中歲學兵符不能守文章功業須及時立
身有行藏男兒感忠義萬里忘越鄉孟夏邊候遲邊城
草未長馬疾過飛鳥天窮超夕陽都護新出師五月發
軍裝甲兵二百萬錯落金光揚揭旗拂崑崙伐鼓震蒲
昌太白引官軍天威臨大荒西望雲似蛇邊人知喪亡
渾驅大宛馬繫取樓蘭王曾到交河城風土斷人腸塞

驛遠如點邊烽互相望赤亭多飄風鼓怒不可當有時
無人行沙石亂飄颺夜靜天蕭條鬼哭夾道傍地上多
觸體皆是古戰場置酒高館夕邊城月蒼蒼軍中宰肥
牛堂上羅羽觴紅淚金燭盤嬌歌艷新粧望若仰青冥
短翮難可翔蒼然西郊道握手何慨慷

天山雪送蕭洎歸京云天山有雪常不開千峰萬嶺雪
崔嵬北風夜捲赤亭口一夜天山雪更厚能兼漢月照
銀山復逐邊風過鐵關交河城邊飛鳥絕輪臺路上馬

蹄滑暗澹寒氣萬里凝闌干陰崖千丈冰將軍狐裘卧
不暖都護寶刀凍欲斷正是天山雪下時送君走馬歸
京師客中何以贈君別唯有青青松樹枝

走馬川行奉送出師西行云君不見走馬滄海邊平沙
莽莽黃入天輪臺九月風夜吼一川碎石大如斗隨風
滿地石亂走匈奴草黃馬正肥金山西見烟塵飛漢家
大將西出師將軍金甲夜不脫半夜軍行戈相撥風頭
如刀面如割馬毛帶雪汗氣蒸五花連錢旋作冰幕中

草檄硯水凝敵騎聞之應膽懾料知短兵不敢接車師
西門佇獻捷

輪臺歌奉送封大夫出師西征云輪臺城頭夜吹角輪
臺城北旄頭落羽書昨夜過梁黎單于已在金山西戍
樓西望煙塵黑漢兵屯在輪臺北上將擁旄西出征小
胡吹笛大軍行四邊戍鼓雪海湧三軍大呼陰山動虜
塞兵氣連雲屯戰場白骨纏草根劍河風急雪片濶沙
口石凍馬蹄脫亞相勤王甚苦辛誓將報主靜邊塵古

來青史誰不見今見功名勝古人

白雪歌送武判官云北風卷地白草折邊城八月即飛
雪忽然一夜春風來千樹萬樹梨花開散入珠簾濕羅
幙狐裘不暖錦衾薄將軍雕弓不得控都護鐵衣冷難
著瀚海闌干千尺冰愁雲黯澹萬里凝中軍置酒飲歸
客更奏琵琶與羌笛紛紛暮雪下轅門風掣紅旗凍不
翻輪臺東門送君去去時雪滿天山路山回路轉不見
君雪上空留馬行處

田使君美人如蓮花舞北旋歌云如蓮花舞北旋世人
有眼應未見高臺滿地鋪氍毹試舞一曲天下無此曲
邊人傳入漢諸客見之驚且歎慢臉嬌娥纖復濃輕羅
金鏤花蔥籠回裾轉袖若飛雪左旋右旋生旋風琵琶
橫笛和未匝花門一作山頭黃雲合忽作出塞入塞聲
白草胡沙寒颯颯翻身入破如有神前見後見回回新
始知諸曲不可能採蓮落梅徒聒人世入學舞祇是舞
姿態豈能得如此

參至德中任宣議郎試大理評事攝監察御史左拾遺
裴薦杜甫等嘗薦參識度清遠議論雅正佳名早立時
輩所仰可備獻替之官云

唐詩紀事卷二十三

欽定四庫全書

唐詩紀事卷二十四

宋 計敏夫 撰

元傑

韋迨

孟彥深

郭受

陶峴

張偁

王昌齡

周萬

包融

顏真卿

丁仙芝

李清

韓滉

齊澣

顧朝陽

韋建

元傑

元傑有瀘陽果業寺開東嶺洞谷銘并序云陰陽精氣

結為山嶽者則為勝為異為輿為闕故萬類交峙而嵩
華辨其方群岳敷靈而瀛壺拔其類是知仙居靈宅其
必有黨乎鳴絃之北趾果業之東阜高不百仞廣纔千
畝層巖石室幽谷靈洞殊景異觀秀絕竒偉雖瀑流之
下鑪峰懸磴之躋丹嶠路遠莫覲餘不知其倫擬焉按
寺記云昔有方士於是山鍊金變形羽服登仙故石座
丹竈至今存焉觀其東額削成石瑩如玉岡巖峭竦巖
壁重複捫藟而昇如造雲根縹渺嬋娟似霞衣可攀真

氣勝而塵累捐五蓋破而清機閑蕩然放懷如羽翼之
已生赤城之可接噫境變志遷若符契之協從也下臨
長川澄波吐瀾烟霞夕收飛鳥不喧青渺逶迤流注無
間西直巨壑連嶂如屏林霽朝翠巖光晝清篠蕩藏輝
杉松下冥虛豁寂寥涵風有聲綠嶺未極劃開洞門黛
容崢嶸詭狀輪迴疑伏龍怪鎮含煙雲又有古木倒傍
絕壁盤根網結掛絡空碧崩崖傍傾援送下仄羽人幽
會此焉瑤席博翠壁而直上軋崎嶇於紫氛雙巖屹以

中斷奔屏戲而成室涵孕精爽澄凝氣源信列仙之幽
居豈塵俗之所止哉嗚呼鶴駕一去鳳蕭響絕荆榛蔽
路危磴敗滅跡留入境而舉世莫知地腴精剝而群遊
莫至吁可怪乎其晦藏也元和丙申歲秋八月余以膠
高之困寓居精舍再從兄昭肅時假茲邑政便於人務
簡多暇與當寺僧知捷日探道源捷亦好古饕奇之士
也因語故實緬思羽客之玄風以為靈跡神蹤精誠必
復乃探及持眷履險道幽梯絕棧而歷巉巖排蒙籠而

登香謁時更一稔而神居秘躅粲然皆睹嗟乎芝田元
圃豈遠乎哉天之與人氣通則合客有顧咨而諗予者
或應之曰天之運否泰相濟故善利稱德下民昏墊人
之道行藏有數故棘津蓬藁時惟鷹揚靈物必通道在
斯著不然何荒阻千祀勃焉而興歟乃為銘曰鑿石通
道兮援木枝仰攀洞口兮踐竒危奔龍伏虎兮勢狀竒
林攢峰倚兮蟠雲螭下臨陰谷兮神以慄嵌巖兮洞無
極老松蕭瑟兮生遠風興雲霈兮烟霧黑懸巖排空兮

色噴黛堅根網絡兮層霄外披霓解帶兮羽翼生下眺
遙江兮入青靄世道紛紛兮何足謂朝為榮華兮夕顯
頽不如幽谷兮閔仙經翼接浮邱兮整煙轡我窺丹竈
兮坐山腹衆峰參差兮隱雲族鑿仙嶺兮望瑤臺朝霞
照海兮錦綺開信赤松之所昇降王喬之所往來道或
用晦兮靈物斯潛殷道未昌兮說棊傳巖紛予感此兮
勒銘雲根山既不朽兮與名長存

常迢

杜子美在長沙送常負外迨牧韶州詩云炎海韶州牧
風流漢署郎分符先令望同舍有輝光白首多年疾秋
天昨夜涼洞庭無過鴈書疏莫相忘

迨留別杜員外院長詩云江畔長沙驛相逢纜客船大
名詩獨步小郡海西偏地濕愁飛鵬天炎畏跼去留
俱失意把臂共潸然

迨早發湘潭寄子美云北風吹夜雨江上早來涼楚岫
千峰翠湘潭一葉黃故人湖外客白首尚為郎相憶無

南雁何時有報章

子美酬云養拙江湖外
朝廷記憶踈深慚
長者轍重得故人書
白髮絲難理
新詩錦不如
雖無南過雁
看取北來魚

子美後送魏司直掌選嶺南兼寄迢云
故人湖外少春
日嶺南長憑報
韶州牧新詩
昨寄將

孟彥深

字士源天寶末為武昌令
元次山居武昌之樊山
新春

大雪彥深以詩問之曰江山十日雪雪深江霧濃起來
望樊山但見羣玉峯林鷲却不語野獸翻有蹤山中應
大寒短褐何以安皓氣凝書帳清着釣魚竿懷君欲進
謁溪滑渡舟難

次山酬云積雪閉山路有人到庭前云是孟武昌今獻
苦雪篇長吟未及終不覺為悽然古之賢達者與世竟
何異不能救時患諷諭以全意知公惜春物豈非愛時
和知公苦陰雪傷彼災患多姦凶正驅馳不合問君子

林鴛與野獸無乃怨如此兵興向九歲稼穡誰能憂何
時不發卒何日不殺牛耕者日以少耕牛日以稀皇天
復何忍更又恐斃之自經危亂來觸物堪傷嘆見君問
何意只益胃中亂山禽飢不飛山木凍皆折懸泉化為
冰寒爐近不熱出門望天地天地皆昏昏時見雙峯下
雪中生白雲

次山又有雪中懷孟武昌云久來三度雪農者歡歲稔
我麥根已濡各得在倉廩天寒未能起孺子驚人寢云

有山客來籃中見冬草生木上燒柴為溫酒煮鱖為作瀆

尺甚反羹汁

客亦愛杯搏思君共杯飲所嗟山路開時節寒

又甚不能苦相邀興盡還就枕

次山作退谷銘曰干進之客不得遊之作杯湖銘曰為人厭者勿泛焉乃曰孟士源嘗黜官無情干進在武昌不為人厭可遊退谷可泛杯湖故有招孟武昌詩云武昌不仕進武昌人不厭退谷可正遊杯湖任來泛湖上有水鳥見人不飛鳴谷中有山獸往往隨人行莫將車

馬來令我鳥獸驚

彥深登天寶二年第

郭受

受寄子美詩云新詩海內流傳久舊德朝中屬望勞郡
邑地卑饒霧雨江湖天濶足風濤杜醪酒熟傍看醉蓮
葉舟輕自學操春興不知凡幾首衡陽紙價頓能高

衡陽

出五家紙又
云出五里紙

子美酬郭十五判官云才微歲老尚虛名卧病江湖春

復生藥裏關心詩總廢花枝照眼句還成只同燕石能
星隕自得隨珠覺夜明喬口橘洲風浪促繁帆何惜片
時程

受大歷間衡陽判官也

陶峴

峴彭澤之孫也開元末家崑山泛遊江湖自制三舟與
孟彥深孟雲卿焦遂共載吳越之士號為水仙省親南
海獲崑崙奴名摩訶善遊水至西塞山下泊舟吉祥佛

舍見江水深黑謂必有怪物投劍命摩訶下取久之支
體磔裂浮于水上現流涕迴棹賦詩自叙不復遊江湖
矣詩云匡廬舊業是誰主吳越新居安自生白髮數莖
歸未得青山一望計還成鴉翻楓葉夕陽動鷺立蘆花
秋水明從此捨舟何所詣酒旗歌扇正相迎

張僊

辭房相公云秋風颯颯雨霏霏愁絕恓惶一布衣辭君
且作隨陽雁海內無家何處歸僊天寶至德間人

王昌齡

昌齡字少伯江寧人中第補校書郎又中博學宏辭科
遷汜水尉不護細行世亂還鄉里為刺史閭邱曉所殺
工詩緒密而思清時謂王江寧

獨遊詩云林卧情每閑獨遊景常晏時從灞陵下垂釣
往南澗手搗雙白魚目送千里雁悟彼飛有適知此罹
憂患放之清冷泉因得省踈慢永惟青岑客迴首白雲
間神超物無違豈繫名與宦

齋心詩云女蘿覆石壁溪水幽濛瀟紫萋蔓黃花娟娟
寒露中朝飲花上露夜卧松下風雲英化為水光彩與
我同日月蕩精魄寥寥天府空

瑩篴引云瀘谿郡南夜泊舟夜聞南岸羌戎謳其時月
黑猿啾啾微雨霑衣令人愁有一遷客登高樓不言不
寐彈瑩篴彈作薊門桑葉秋風沙颯颯青塚頭將軍鐵
驄汗血流深入匈奴戰未休黃旗一點兵馬收亂殺敵
人積如邱瘡病驅來配邊州仍披漠北羊羔裘顏色饑

枯掩面羞眼眶滴淚深兩眸還思本鄉食糞牛欲語不
得指咽喉或有強壯能呶嘍意說被他邊將雙言五世屬
蕃漢主留碧毛氈帳河曲遊橐駝五萬部落稠勅賜飛
鳳金塊釐為君百戰如過籌靜掃陰山無鳥投家藏鐵
券特承優黃金千斤不稱求九族分離作楚囚深谿寂
寞絃苦幽草木悲感聲颼颼僕本山東為國憂光明殿
前論九疇屢讀兵書盡宜授為君掌上施權謀洞曉山
川無與儔紫宸發詔懷遠柔搖筆飛箱如奪鉤鬼神不

得知其由憐愛蒼生比蚍蜉緣河屯兵須漸抽盡遣降
來拜御溝便令海內休戈矛何用班超定遠侯史臣書
之得已不

長信秋云金井梧桐秋葉黃珠簾不捲夜來霜熏籠玉
枕無顏色卧聽南宮清漏長

奉帚平明秋殿開且將團扇共徘徊玉顏不及寒鴉色
猶帶昭陽日影來

西宮秋怨云芙蓉不及美人粧水殿風來珠翠香誰分

含啼掩秋扇空懸明月待君王

啼一作情

西宮春怨云西宮夜靜百花香欲卷珠簾春恨長斜抱雲和深見月朦朧樹色隱朝陽

青樓怨云香幃風動花入樓高調鳴箏緩夜愁腸斷關山不解說依依殘月下簾鉤

送李濯遊江東詩云清洛日夜漲微風引孤舟離觴使千里遠夢生江樓

楚國橙橘暗吳門烟雨愁東南且今古歸望山雲秋

商璠云元嘉已還四百年內曾劉陸謝風骨頓盡今昌
齡克嗣厥跡至如明堂坐天子月朔朝諸侯清樂動千
門皇風被九州慶雲從東出泱泱抱日流又獨飲灞上
亭寒山青門外長雲驟落日東來寂已晦又蒼葭寒滄
江石頭岸邊飲又長亭酒未酣千里風動地又京門望
西嶽百里見郊樹飛雨祠下來靄然關中暮又奸雄乃
得志遂使羣心搖赤風蕩中原烈火無遺業一人計不
用萬里空蕭條又百泉勢相蕩巨石皆却立昏為蛟龍

怒清見雲雨入又去時三十萬獨自還長安不信沙場
苦君看刀箭瘢又雲起太華山雲山互明滅東風始含
景了了見松雪又楸枏無冬春柯葉連峯凋險壁下蒼
黑煙含清江樓壘沙積為岡崩剝雨露幽石脉盡橫亘
潛潭何時流斯並驚耳駭目畧舉十句則中興高作可
知矣予嘗觀昌齡齋心詩吊軹道賦謂其人孤潔恬澹
與物無傷晚節謗議沸騰言行相背及淪落竄謫竟未
減才名固知善毀者不能掩西施之美也

放歌行云南渡洛陽津西望十二樓明堂坐天子月朔
朝諸侯清樂動千門皇風被九州慶雲從東來決潁抱
日流昇平貴論道文墨將何求有詔徵草澤微誠將獻
謀冠冕如星羅拜揖曾與周望塵非吾事入賦且遲留
幸蒙國士識因脫負新裘今者放歌行以慰梁甫愁位
榮數計祿奉養每豐羞願得金膏遂飛雲亦可籌

代扶風主人答云殺氣凝不流風悲日彩寒浮塵起四
遠遊子彌不歡依然宿扶風沽酒聊自寬寸心亦未理

長鈇誰能彈主人就我飲對我還慨歎便泣數行淚因
歌行路難十五役邊城三迴討樓蘭連年不解甲積日
無所殮將軍降匈奴國使沒桑乾去時三十萬獨自還
長安不信沙場苦君看刀箭瘢鄉親悉零落塚墓亦摧
殘仰攀青松枝慟哭傷心肝禽獸悲不去路旁誰忍看
幸逢休明代寰宇靜波瀾老馬思伏櫪長鳴力已殫少
年與君會何事發悲端天子初封禪賢良刷羽翰三邊
悉如此否泰亦須觀

鄭縣宿陶大公館中贈馮六元二云儒有輕王侯脫畧
當世務本家藍田下非為漁弋故無何困躬耕且欲馳
永路幽居與君近出谷同所鶩昨日辭石門五年變秋
露雲龍未相感干謁亦以屢子為黃綬羈子忝蓬山顧
京門望西嶽百里見郊樹飛雨祠上來靄然關中暮馳
車鄭城宿秉燭論永素山月出華陰開此河渚霧清光
比故人豁達展心晤馮公尚戢翼元子仍跼步拂衣易
為高淪跡難有趣張范善始終吾等豈不慕罷酒當涼

風屈伸備冥數

小敦谷龍潭祠作詩云崖谷歎疾流地中有雷集百泉
勢相蕩巨石皆却立跳波沸崢嶸深處不可挹昏為蛟
龍怒清見雲雨入靈怪崇偏祠廢興自茲邑沉淫頃多
昧簷宇遂不葺吾聞被明典盛德惟世及生人載山川
血食報原隰豈伊駭微險將以循忙揖舟飛振呂梁忠
信亦我習波流侵已廣悔吝在所汲溪水有清源褰裳
靡沾濕

過華陰詩云雲起太華山山色互明滅東峰始含景了
了見松雪羈人感幽棲宵映轉奇絕欣然忘所疲永望
吟不輟信宿百里餘山開翫新月何意昨來心遇物遂

遷別人生屢如此何以肆愉悅

山色一作雲仙

出郴山口至壘石灣野人室中寄張十一詩云櫛栴無
冬春柯葉連峰稠陰壁下蒼黑煙含清江樓景開獨沿
曳響谷隨興酬旦夕望吾友如何迅孤舟壘沙積為岡
崩剝雨露幽石脈畫橫亘潛潭何時流既見萬古色頗

盡一物由水與世人遠氣還草木収盈縮理無餘今往
何必憂郴土羣山高耆老如中州孰云議外降豈是娛
官遊陰火昔所服丹砂將爾謀昨臨蘇耽井復向衡陽
求同疢來相依脫身當有籌數月乃離居風湍成阻脩
野人善竹器童子能溪詎寒月波蕩漾羈鴻去悠悠同疢

一作
問疢

九江口作詩云潏潏江勢濶雨開潯陽秋驛門是高岸
望盡黃蘆洲水與五溪合心期萬里遊明時無棄才謫

去隨孤舟鷺鳥立寒木丈夫佩吳鉤何當報君恩却繫
風霜頭

從軍行二首云向夕臨大荒朔風軫歸慮平沙萬里餘
飛鳥宿何處敵騎獵長原翩翩傍河去邊聲搖白草海
氣生黃霧百戰起風塵十年履霜露雖投定遠筆未坐
將軍樹早知行路難悔不理章句

秋風馬蹄輕角弓持絃急去為龍城戰正值邊兵襲軍
氣橫大荒戰酣日將入長風金鼓動白露鐵衣濕四起

愁邊聲南庭時竚立斷蓬孤自轉寒鴈飛相及萬里雲
沙漲平原冰霰澁惟聞漢州遥獨向刀環泣

周萬

送沈芳謁李觀察求仕進詩云往日長安路歡遊不惜
年為貪廬女曲用盡沈郎錢身老方投刺途窮始着鞭
猶聞有知己此去不徒然

此君曾浪迹長安因以詩讓之

萬開元末登第

包融

送國子張主簿詩云湖岸纜初解鶯啼別離處還見舟
中人時時一回顧坐悲芳歲晚花落晴軒樹春夢隨我
心搖揚逐君去

融潤州延陵人歷大理司直二子何佶齊名世稱二包
孟浩然宴包二融宅詩曰閑居枕清洛左右接大野門
庭無雜賓車轍多長者是時方盛夏風物自瀟洒五月
休沐歸相攜竹林下開襟成懽趣對酌不能罷煙暝棲
鳥迷餘將歸白社

顏真卿

吳門有清遠道士同沈恭子遊虎邱詩其辭自商周歷
近代抑二千年来矣鬼神耶隱士耶莫能測也而辭藻
健俊魯公愛之刻於巖際并有鑑作衛公又次而和之
清遠道士詩云我本長殷周遭罹歷秦漢四瀆與五嶽
名山盡幽竄及此寰區中始有近峯翫近峯何鬱鬱
湖眇瀾漫吟挽川之陰步上山之岸山川共澄澈光彩
交凌亂白雲翁欲歸青松忽消半客去川島靜人來山

鳥散谷深中見日崖幽曉非旦聞子盛遊遨風流足詞
翰嘉茲好松石一言常累歎勿謂餘鬼神忻君共幽讚
魯公詩云不到東西寺于今五十春竭來從舊賞林壑
宛相親吳子多藏日秦皇厭勝辰劔池穿萬仞盤石坐
千人金氣騰為虎琴臺化若神登壇仰生一捨宅歎珣
珉中嶺分雙樹迴巖絕四鄰窺臨江海接崇飾四時新
客有神仙者於茲雅麗陳名高清遠峽文聚斗牛津跡
異心寧間聲同質豈均悠然千載後知我揖光塵

衛公詩云茂苑有靈峰嗟余未遊觀藏山在平陸壞谷
有高岸岡繞數仞墻巖潛千丈幹乃知造化意迴幹資
竒翫鏐騰首虎踞劍沒嘗龍煥潭黛入海底釜峯聳霄
半層巒未昇日哀狖寧知旦綠篠夏凝陰碧林秋不換
冥搜既窈窕迥望何蕭散川曉嵐氣收江春雜英亂逸
人綴清藻前哲留篇翰共扣哀玉音皆舒文繡段難追
彥回賞褚彥回見凡人所稱常過其實又見虎邱則逾其所聞徒起興公歎一力
如再升含毫星斗爛

金少...
卷二十四
真卿與耿漳水亭詠風聯句有度琴方解愠臨水已迎
秋之句

丁仙芝

長寧公主舊山池詩云平陽舊池館寂寞使人愁座卷
留黃簾簾垂白玉鈎庭閒花自落門閉水空流追想吹
簫處應隨仙騎遊

越裳貢白雉云聖哲承休運伊臯列上台尋思丹徼遠
入貢素輦來北闕欣初見南枝顧未迴歛容殘雪靜嬌

翼片雲開馴擾將無懼
翬飛幸不猜甘從上林裏
飲啄自徘徊

仙芝潤州曲阿人登開元進士第為餘杭尉

李清

詠石季倫云金谷繁華石季倫
只能謀富不謀身當時縱與綠珠去
猶自無窮歌舞人

清登天寶十二年進士第

韓滉

晦日呈諸判官云晦日新晴春日嬌萬家攀折渡長橋
年年老向江城寺不覺春風換柳條

聞樂悵然自述云萬事傷心對管絃一身含淚向春煙
黃金用盡教歌舞留與他人樂少年

澆字太冲貞元初加同平章事江淮轉運使二年封晉
國公初有美名所與遊皆天下豪俊其詩與孟浩然酬
唱云

齊澣

長門怨云營營孤思通寂寂長門夜妾妬亦知非君恩
那不借攜琴就玉階調悲心未諧將心寄明月流影入
君懷

澣字洗心定州人開元間與蘇晉蘇頲賈曾韓休許景
先孫逖典詔誥為代言最杜暹當國表宋璟為吏部尚
書澣及蘇晉為侍郎世謂臺選常稱陳希烈苗晉卿之
才後皆大顯

顧朝陽

昭君怨云莫將鉛粉匣不用鏡花光一去邊城路何情
更畫粧影銷胡地月衣盡漢宮香妾死非關命都緣愁
斷腸

朝陽開元間詩人

韋建

泊舟盱眙云維舟淮水次霜降夕流清夜出潮侵岸天
寒月近城平沙依雁宿候館聽雞鳴鄉國雲霄外誰堪
羈旅情

建與蕭穎士最善



唐詩紀事卷二十四

欽定四庫全書

集部

唐詩紀事卷二十五至

七

詳校官監察御史臣沈孫鍾

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣楊其梓

謄錄監生臣陳際龍

欽定四庫全書

唐詩紀事卷二十五

宋 計敏夫 撰

徐安貞

崔惠童

崔敏童

劉晏

劉灣

薛據

劉昶虛

張巡

張繼

張謂

梁肅

柳渾

孟雲卿

徐安貞

襄陽圖云畫得襄陽郡依然見昔遊峴山思駐馬漢

水憶回舟丹竇常含霽青林不換秋圖書空咫尺千里
意悠悠

安貞始名楚璧應制舉三登甲科開元中為中書舍人
集賢學士帝屬文多令視草終中書侍郎在中書省久
李林甫用事或言計議多所參助云或云安貞天寶後
以林甫之故避罪衡山岳寺李北海遊岳識之因戲曰
峴山思駐馬漢水憶迴舟暮雨衣猶濕春風帆正開抑
能記否因同載北歸至長沙謂守者曰瀟湘逢故人若

幽谷之覩太陽不然委頓巖穴矣

崔惠童

宴城東庄云一月人生笑幾回相逢相識且啣杯眼看
春色如流水今日飛花昨日開

尚明皇晉國公主

崔敏童

宴城東庄云一年始有一年春百歲曾無百歲人能向
花中幾回醉十千沽酒莫辭貧

敏童惠童昆弟也

劉晏

明皇御勤政樓大張樂羅列百伎時教坊有王大娘者
戴百尺竿竿上施木山狀瀛州方丈令小兒持絳節出
入於其間歌舞不輟時劉晏以神童為秘書正字方十
歲帝召之貴妃置之膝上為施粉黛與之巾櫛帝問晏
汝為正字正得幾字晏曰天下字皆正唯朋字未正得
貴妃復令詠王大娘戴竿晏應聲曰樓前百戲競爭新

唯有長竿妙入神誰謂綺羅翻有力猶自嫌輕更着人
因命牙笏及黃綾袍賜之

晏八歲獻頌泰山行在帝命張說試之說曰國瑞也即
授太子正字公卿邀請旁午號神童晏字士安

劉灣

字靈源彭城人天寶進士天寶之亂以侍御史居衡陽
元結送王契佐卿入蜀序曰與佐卿去者有清河崔異
與次山住者有彭城劉灣相醉相留幾日江畔

出塞曲云將軍在重圍音信絕不通羽書如流星飛入
甘泉宮倚是并州兒少年心膽雄一朝隨名募百戰爭
王公去年桑乾北今年桑乾東死是征人死功是將軍
功汗馬牧秋月疲卒卧霜風仍聞左賢王更欲圍雲中
即席賦露中菊云衆芳春競發寒菊露偏滋受氣何曾
異開花獨自遲晚成猶有分欲採未過時勿棄東籬下
省隨秋草衰

元次山作劉侍御月夜讌會序云兵興以來十一年矣

獲與同人歡醉達旦詠歌取適無一二焉乙巳歲彭城
劉靈源在衡陽逢故人或有在者日夕相會第寬遠遊
始與諸公待月而笑語競與諸公愛月而歡詠夜久賦
詩言懷於戲文章道喪蓋亦久矣時之作者煩雜過多
歌兒舞女且相喜愛系之風雅誰道是耶諸公嘗欲變
時俗之淫靡為後生之規範今夕豈不能道達情性成
一時之美乎次山詩曰我從蒼梧來將耕舊山田跼蹐
為故人且復停歸船日夕得相從轉覺和樂全愚愛涼

風來明月正滿天河漢望不見幾星猶燦然中夜興欲
酣改坐臨清川未醉恐天旦更歌促繁絃歡娛不可逢
請君莫言旋

薛據

出青門往南山下別業云舊居在南山夙駕自城闕榛
莽相蔽虧去爾漸超忽散漫餘雪晴蒼茫季冬月寒風
吹長林白日原上沒懷抱曠莫伸相知阻胡越弱年好
棲隱鍊藥在巖窟及此離垢氛興來亦因物末路期赤

松斯言庶不伐

西陵口觀海云浙江漫湯湯近海勢彌廣在昔胚渾凝
融為百川長地形失端倪天色潛澁滢東南際萬里極
目遠無象山影乍浮沉潮波忽來往孤帆或不見棹歌
猶想像日暮長風起客心空振蕩浦口霞未收潭心月
初上林嶼幾遭迴亭臯時偃仰歲晏訪蓬瀛真遊非外
獎

據與王摩詰杜子美最善子美有喜薛三據授司議郎

詩云文章開竅與遷擢潤朝廷又有寄薛三郎中詩云
與子俱白頭役役常苦辛雖為尚書郎不及村野人天
未厭戎馬我輩本常貧子尚客荊州我亦滯江濱聞子
心甚壯所過信席珍賦詩賓客間揮灑動八垠乃知蓋
代手才力老益神其略如此

據自永樂主簿陟縣丞復選宰陟縣劉長卿贈詩云棲
鸞往已屈馴翟今可嗣此道如不移雲霄坐應致縣前
漳水綠郭外晉山翠日得謝客遊時堪陶令醉

高適淇上寄據云故交負靈竒逸氣包蹇諤隱軫經濟
具縱橫建安作

據開元中自恃才名於吏部參選請授萬年錄事諸流
外官共見宰執訴之曰赤錄事某等清要官今被進士
奪去某等色人無措手足矣遂罷

商璠云據為人骨鯁兼有氣魄其文亦不自傷不卑不
達故著古興詩云投珠恐見疑抱玉但垂泣道在君不
舉功成歎何及怨憤頗深至如寒風吹長林白日原上

沒又窮冬時短晷日盡西南天可謂曠代之佳句也

據河中寶鼎人中書舍人文思曾孫父元暉什邡令開元天寶間據與弟播摠相繼登科終禮部侍郎

省署開文苑滄浪學釣翁據之詩也子美懷據詩乃云獨當省署開文苑兼泛滄浪學釣翁

據古興云日中望雙闕軒蓋揚飛塵鳴珮初罷朝自言皆近臣光華滿道路意氣安可親歸米宴高堂廣筵羅八珍僕妾盡錦綺歌舞夜達晨四時自相代誰能分要

津已省覆前車未見改後輪丈夫須兼濟豈得樂一身
君今皆得志肯顧憔悴人

初去郡書情云肅徒辭汝潁懷古獨悽然尚想文王化
猶思巢父賢時移多讒巧大道竟誰傳况是疾風起悠
悠旌旆懸征鳥無返翼歸流不停川已經霜露下乃驗
松柏堅回首望城邑迢迢間雲煙志士不傷物小人皆
自妍感時唯責已在道非怨天從此適樂土東歸知幾
年

劉春虛

贈喬林云去年上策不見收今年寄食仍淹留羨君有
酒能共醉羨君無錢能不憂如今五侯不待客羨君不
問五侯宅如今七貴方自尊羨君不過七貴門大夫會
應有知己世上悠悠何足論

贈閻防云青冥南山色君與緇錫鄰深路入古寺亂花
隨暮春紛紛對寂寞往往落衣巾松色空照水經聲時
有人晚心復南望山遠情獨親應以脩往業亦唯立此

身深林度空夜煙月資清真莫歎文明日彌年徒隱淪
九日送人云海上正搖落客中還別離同舟去未已遠
送新相知流水意何極滿樽徒爾為從來菊花節早已
醉東籬

江南曲云美人何蕩漾湖上風日長玉手欲有贈徘徊
雙鳴璫唱歌隨綠水怨色起春陽日暮還家望煙雲橫
洞房

登廬山峰頂寺云孤峰留萬象秋氣何高清天際南郡

出林端西江明山門二緇叟振錫聞幽聲心照有無界
業懸前後生徒知真機靜尚與愛網并方首金門路未
遑參道情

暮秋揚子江寄孟浩然云木葉紛紛下東南日煙霜山
林相曉暮天海深青蒼暝色空復久秋聲亦何長孤舟
兼微月獨夜仍越鄉寒笛對京口故人在襄陽詠思勞
今夕江漢遥相望

海上云日出歸且遠送君東悠悠滄溟千萬里日夜一

孤舟曠望絕國所微茫天際愁有時近仙境不定若夢
遊或見青色石孤山百丈秋前心方杳眇此路勞夷遊
離別惜吾道風波敬皇休春浮花氣遠思逐海水流日
莫離歌後永懷空滄州

鄭處誨明皇雜錄云天寶末劉希夷王泠然王昌齡祖
詠張若虛張子容孟浩然常建李白劉昫春虛崔署杜甫
雖有文章盛名皆流落不偶

商璠云春虛詩情幽興遠思苦詞奇忽有所得便驚衆

聽頃東南高唱者十數人然聲律婉態無出其右雖氣
骨不逮諸公自永明以來可傑立江表至如松色空照
水經聲時有人又滄溟千萬里日夜一孤舟道自白雲
靜春與青溪長時有落花至遠隨流水香開門向溪路
深柳讀書堂幽映每落日清輝照衣裳並方外之言也
惜其不永天年隕碎國寶

王昌齡宿京江口期春虛不至詩云霜天起長望殘月
生海門風靜夜潮滿城高寒氣昏故人何寂寞久已乖

清言明發不能寐徒盈江上樽又送春虛歸取宏詞解
云天清聞海鶴遊子引鄉盼聲隨羽儀遠勢與歸雲便
青桂春再榮白雲暮來變遷飛在禮義豈復淚如霏
孟浩然九日於龍沙寄劉大春虛云龍沙豫章北九日
挂帆過風俗因時見湖山發興多客中誰送酒棹果自
成歌歌竟乘流去滔滔任夕波

張巡

守睢陽日嘗賦詩曰接戰春來苦孤城日漸危合圍侔月

暈分守劾魚麗屢厭黃塵起時將白羽揮襄瘡猶出陣
飲血更登陴忠信應難敵堅貞自不移無人報天子心
計欲何施

又夜聞笛云
峒堯試一臨虜騎俯城陰不辨風塵色安
知天地心營開星月近戰苦陣雲深旦夕更樓上遙聞
橫笛吟

巡謝金吾將軍表云想峨嵋之碧峰豫遊西蜀追綠耳
於懸圃保壽南山逆賊祿山殺戮黎獻羶腥闕庭臣被

圍四十七日凡一千八百餘戰主辱臣死當臣効命之時惡稔罪盈是賊滅亡之日

巡祭纛文曰太一先鋒蚩尤後殿蒼龍持弓白虎捧箭
祭城隍云智井鳩翔危堞龍攫皆文武雄健志氣不衰
真忠烈士也

巡字巡鄧州人博通羣書為文章不立彙以忠義死睢
陽

張繼

閭門即事云耕夫召募逐樓船春草青青萬頃田試上
吳門看郡郭清明幾處有新煙

清明日自西午橋至瓜巖村有懷云晚霽龍門雨春生
汝穴風鳥啼官路靜花發毀垣空鳴玉慙時輩垂絲學
老翁舊遊人不見惆悵洛城東

洛陽作云洛陽天子縣金谷石崇鄉草色侵官道花枝
出苑墻書成休逐客賦罷遂為郎貧賤非吾事西遊思
自強

春夜皇甫冉宅對酒云流落時相見悲歡共此情興因
樽酒洽愁為故人輕暗滴花垂露斜輝月過城那知橫
吹曲江外作邊聲

安公房間法云流年一日復一日世事何時是了時試
向東林問禪伯遺將心地學琉璃

高仲武云張繼負外累代詞伯積襲弓箕其於為文不
雕不飾及爾登第秀發當時詩體清迥有道者風如女
停襄邑杼農廢汶陽耕使者乘軺去諸侯擁節迎火燎

原猶熱波搖海未平此興深矣

繼字懿孫襄州人登天寶進士第大歷末檢校祠部員外郎分掌財賦於洪州送郗紹充河南租庸判官云齊魯傷心地頻年此用兵女停襄邑杼農廢汶陽耕使者乘輅去諸侯擁節迎深仁佐君子薄賦郵黎甿火燎原猶熱波搖海未平應將否泰理一問魯諸生

感懷云調與時人背心將靜者論經年帝城裏不識五侯門

伉儷歿於洪州劉長卿哭張員外云白簡曾連拜滄州
每共思撫存憐稚齒歎逝顧身衰自此辭張劭何由見
戴逵獨聞山吏部流涕訪孤兒

楓橋夜泊云月落烏啼霜滿天江楓漁火對愁眠姑蘇

城外寒山寺夜半鐘聲到客船

此地有夜半鐘謂之無常鐘繼志其異耳歐陽

以為語病非也

張謂

負薪老翁往北州北望鄉關生客愁自言老翁有三子

兩人已向黃沙死如今少男新長成明年聞道更徵兵
定知此別必零落不及相隨同死生盡將田宅借鄰伍
且復伶俜去鄉土在生本求多子孫及有誰知更苦辛
近傳天子尊武臣強兵直欲靜邊塵安邊自合有長策
何必流離中國人

代北州
老翁答

送盧舉使河源詩云故人行役向邊州疋馬今朝不少
留長路關山何日盡滿堂絲管為君愁

同諸公遊雲公禪院云共許尋雞足誰能惜馬蹄長空

淨雲雨斜日半虹蜺
簷下千峰轉窗前萬木低
看花尋逕遠聽鳥入林迷
地與喧卑隔人將物我齊
不知樵客意何事武陵溪

送青龍一公云事佛輕金印
勤王度玉關不知從樹下
還許到人間
楚水清蓮淨吳門白日閑
聖朝須助治切莫愛東山

哭護國上人云昔喜三身靜
今悲萬劫長不應歸北斗
多是向西方舍利衆
生得袈裟弟子將嵐行
殘藥梳蟲

網舊繩床別起千花塔空留一草堂支公何處在神理
竟茫茫

麓山精舍送莫侍御歸寧云何處堪留客香林隱翠微
薜蘿通驛騎松竹掛朝衣霜引臺烏集風驚塔雁飛飲
茶勝飲酒聊以送將歸

乾元中謂以尚書郎出使夏口沔州牧杜公觴于江城
之南湖謂命李白標之嘉名白目為郎官湖云謂同王
徵君湘中有懷云八月洞庭秋瀟湘水北流還家萬里

夢為客五更愁不用開書帙偏宜上酒樓故人京洛客
何日復同遊

玉清公主挽歌云學鳳羊猶少乘龍日尚賒初封千戶
邑忽駕五雲車地接金人岍山通玉女家秋風何太早

吹落禁園花

代宗
之女

謂登天寶二年進士第奉使長沙嘗作長沙風土記云
巨唐八葉元聖六載正言待罪湘東

商璠云謂代北州老翁答及湖中對酒行並在物情之

外衆人未曾說耳亦何必歷遐遠探古跡然後始為冥
搜謂湖中對酒行云夜坐不厭湖上月晝遊不厭湖上
山眼前一罇又長滿心中萬事如等閑主人有黍百餘
石濁醪數斗應不惜即今相對不盡歡別後相思復何
益茱萸灣頭歸路賒願君且宿黃翁家風光若此人不
醉參差辜負東園花

謂大歷間為禮部侍郎興七年八年九年貢舉

梁肅

肅字欽之世居陸渾蕭復杜佑交薦辟終右補闕崔恭
序其文以肅文雖多而無適時之用故以皇甫士安比
之

肅贊四皓云秦失其祿豪傑並逐鸞鳳何依白雲深谷
英英南山采采紫芝漢以劍起吾誰與歸栖心化元澹
泊無為禮物雖至先生默而惟彼貞名確不可轉儲皇
不安我德用顯大君是驚愈位是寧四公屈身天下和
平弋者何思鴻飛冥冥

柳渾

貞元中牡丹多渾詩云近來無奈牡丹何數十千錢買
一窠今朝始得分明見也共戎葵不較多

見酉陽雜俎

渾字夷曠不樂拘檢為貞元宰相

孟雲卿

宋郊詩云徘徊宋郊上不見平生親獨立正傷心悲風
來孟津大方載羣物生死有常倫虎豹不相食哀哉人
食人豈知逢世運天道亮云云

又云太虛流素月三五何皎明光耀侵白日賢愚迷至
精四時更變化天道有虧盈常恐今已沒須臾復更生
雲卿河南人元次山送孟校書往南海云雲卿與次山
同州里以辭學相友少次山六七歲聲名滿天下知己
在朝廷及次山之年何事不可勿愛羅浮往而不歸也
雲卿鄴城懷古云朝發淇水南將尋北燕路魏家舊城
闕寥落無人住伊昔天地屯曹公獨中據群臣將北面
白日忽西暮三臺竟寂寥萬世難長固雄豪安在哉衰

草沾霜露雀窺長河北尚見應劉墓古樹藏龍蛇荒茅
伏狐兔永懷故池館數子章連句逸興驅山河雄辭變
雲霧我行覩遺跡精爽如相遇斗酒將酌君悲風白楊
樹

古挽歌云草草閭巷喧塗車儼成位冥寂何所須盡我
生人意北去路非遠此別終天地臨穴頻撫棺至哀反
無淚爾形未衰老爾息猶童稚骨肉安可離皇天若容
易房帳即虛張庭宇為哀吹薤露歌若斯人生盡如寄

別離曲云結髮生別離相思復相保何知日已久五變
庭中草渺渺大海途悠悠吳江島但懼不出門出門無
遠道遠道行既難家貧衣服單巖風吹積雪晨起莫何
酸人生各有戀豈不懷爾安分明天上日生死誓同歡
傷懷醅故友詩云悄悄晨雞翔淅淅草上霜人生早艱
苦壽命恐不長二十學已成三十名不彰豈無同門友
貴賤易中腸驅馬行萬里悠悠過帝鄉幸因絃歌未得
上君子堂衆樂互喧奏獨余被笙簧坐中無知音安得

神洋洋願因高風起上感白日光

古別離云朝日上高臺離人怨秋草但見萬里天不見
萬里道君行本遙遠苦樂誠難保宿昔夢同衾心憂夢
顛倒含酸欲誰訴輾轉傷懷抱白髮年已深征行去何
早寒暄有時謝顛顛難再好人皆笑年壽死者何曾老
少壯無會期水深風浩浩

高仲武云孟君詩祖述沈千運賊中十首又漁獵陳拾
遺詞氣傷苦怨者之流如虎豹不相食哀哉人食人方

於七哀路有饑婦人抱子棄草間則雲卿深矣懇雖效
之於陳沈纔能昇堂猶未入室然當今古調無出其右
者一時之英也余感懇君平生好古著格律門論及譜
二篇以攝其體統

雲卿與杜子美元次山最善

群物歸大化六龍頽西荒

感懷句

安知浮雲外日月不運

行苦雨孤兒去慈親孤客喪主人莫吟辛苦曲此曲誰

忍聞可聞不可說去去無期別行人念前程不待參辰

沒朝亦常苦饑暮亦常苦饑飄飄萬里餘貧賤多是非
少年莫遠行遠行多不歸悲哉行右張為取作主客圖以
雲卿為高古與逸主

唐詩紀事卷二十五